

SLUŽBENE NOVINE

KANTONA SARAJEVO

Godina XIV – Broj
4

Ponedjeljak, 9. februara 2009. godine
S A R A J E V O

ISSN 1512-7052

KANTON SARAJEVO

Vlada Kantona

Na osnovu čl. 22. i 24. stav 2. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst), Vlada Kantona Sarajevo, na Trećoj sjednici održanoj 5. februara 2009. godine, donijela je

ODLUKU

O NAČINU OBRAZOVANJA I UTVRĐIVANJA VISINE NAKNADE ZA RAD RADNIH TIJELA KOJE OBRAZUJE VLADA KANTONA SARAJEVO I RUKOVODIOCI KANTONALNIH ORGANA DRŽAVNE SLUŽBE

I.

Ovom Odlukom utvrđuje se način obrazovanja stručnih komisija, savjeta i drugih radnih tijela: u daljnjem tekstu: Komisija), uslovi i kriteriji za obrazovanje Komisije, način ostvarivanja i visina novčane naknade za članove Komisije.

Pod Komisijom iz stava 1. ove tačke podrazumijeva se:

- Komisija koju obrazuje Vlada Kantona Sarajevo (u daljnjem tekstu: Vlada), čiji članovi mogu biti članovi Vlade, savjetnici članova Vlade, rukovodeći i drugi državni službenici;
- Komisija koju obrazuje Vlada, na prijedlog resornih ministara, a čiji članovi su predstavnici jednog ili više organa državne službe;
- Komisija koju samostalno obrazuje rukovodilac kantonalnog organa državne službe (u daljnjem tekstu: rukovodilac), po potrebi ili na osnovu posebnih propisa, a čiji članovi su predstavnici jednog ili više organa državne službe.

Članovi Komisije iz stava 2. ove tačke mogu biti i stručnjaci koji nisu u radnom odnosu u kantonalnim organima državne službe, a predloženi su zbog svoje stručnosti kao vanjski saradnici.

Članovi Komisije iz stava 2. ove tačke, mogu biti angažovani najviše u dvije komisije istovremeno.

II.

Komisija se može obrazovati radi:

- izrade radnih verzija zakona i podzakonskih akata,
- prikupljanja odgovarajućih podataka i izrade analiza, elaborata, stručnih mišljenja i sl.
- predlaganja kadrovskih imenovanja odnosno postavljenja,
- provođenja redovnog godišnjeg popisa stalnih sredstava, obaveza i potraživanja,
- provođenja postupka javnih nabavki,
- davanja informacija i mišljenja, i
- vršenja drugih poslova i zadataka utvrđenih aktom o obrazovanju Komisije.

Komisija se može obrazovati samo za poslove i radne zadatke koji nisu u djelokrugu nijednog uposlenog u kantonalnom organu državne službe, kao i za poslove i radne zadatke za koje je posebnim zakonskim i podzakonskim aktima utvrđeno da ih obavlja Komisija.

III.

Aktom o obrazovanju Komisije mogu se odrediti stručna, odnosno tehnička lica koja će obavljati stručne, odnosno administrativno-tehničke poslove za potrebe Komisije.

Akt o obrazovanju Komisije obavezno sadrži sljedeće podatke: ime i prezime predsjednika i članova Komisije, naziv organa državne službe u kojem je član Komisije zaposlen, ime i prezime stručnih odnosno tehničkih lica za obavljanje stručnih odnosno administrativno-tehničkih poslova za potrebe Komisije, poslove i zadatke Komisije, rok za izvršavanje poslova i zadataka i pravo na naknadu članova i stručnih i tehničkih lica Komisije.

Rok za obavljanje poslova i zadataka Komisije ne može biti duži od 90 dana, osim komisija Vlade, obrazovanih u skladu sa članom 33. Poslovnika Vlade Kantona Sarajevo ("Službene novine Kantona Sarajevo", broj 2/02).

Smatra se da su poslovi i zadaci Komisije izvršeni nakon prihvatanja izvještaja od strane Vlade ili rukovodioca koji je obrazovao Komisiju, nakon čega organ koji je obrazovao Komisiju donosi rješenje o utvrđivanju visine i isplati naknade za rad u Komisiji.

IV.

Kriteriji za utvrđivanje visine naknade članovima Komisije su:

- složenost oblasti za koju se obrazuje Komisija,
- potrebna stručnost,
- broj završenih predmeta,
- potreba praktičnog rada na terenu,
- obuhvat različitih oblasti,
- obim poslova i zadataka,
- precizno određeni rokovi za izvršenje poslova i zadataka, i

- broj održanih sjednica stalne komisije Vlade, obrazovane u skladu sa Poslovníkom Vlade, uz uslov da se održi najmanje jedna sjednica mjesečno.

Članovi Komisije ostvaruju naknadu samo pod uslovom da su poslove i radne zadatke za koje su zaduženi aktom o osnivanju Komisije obavljali poslije redovnog radnog vremena.

V.

Za učešće u radu Komisije, njenim članovima pripada mjesečna naknada najviše u visini do 50% iznosa prosječne mjesečne neto plaće po zaposlenom u Federaciji Bosne i Hercegovine (u daljnjem tekstu: Federacija) za protekli mjesec, u odnosu na mjesec za koji se obračun naknade vrši.

Za učešće u radu Komisije iz člana 33. Poslovníka Vlade Kantona Sarajevo, njenim članovima pripada naknada do visine prosječne neto plaće po zaposlenom u Federaciji za protekli mjesec, u odnosu na mjesec za koji se obračun naknade vrši.

Stručnom licu iz tačke III. stav 2. ove Odluke, pripada mjesečna naknada najviše do 60% iznosa iz stava 1. ove tačke.

Tehničkom licu iz tačke III. stav 2. ove Odluke, pripada mjesečna naknada najviše do 30% iznosa iz stava 1. ove tačke.

Naknada se isplaćuje po izvršenom zadatku i isključuje pravo na prekovremeni rad.

VI.

Sekretar Vlade i rukovodilac dužni su Ministarstvu finansija dostavljati tromjesečne izvještaje o visini isplaćenih naknada za članove Komisije.

VII.

Ova Odluka ne primjenjuje se na komisije čije je obrazovanje regulisano posebnim zakonima i drugim propisima.

VIII.

Danom početka primjene ove Odluke prestaje da važi Odluka o načinu obrazovanja i visini naknade za rad stručnih komisija, savjeta i drugih radnih tijela koje obrazuje Vlada Kantona Sarajevo i rukovodilac kantonalnog organa državne službe ("Službene novine Kantona Sarajevo", br. 5/05 i 18/05).

IX.

Ova Odluka primjenjuje se od dana objavljivanja u "Službenim novinama Kantona Sarajevo".

Broj 02-05-2094-3/09
5. februara 2009. godine
Sarajevo

Premijer
Besim Mehmedić, s. r.